

- प्रधानमंत्री नरेन्द्र मोदी डिजिटल अरेस्ट रा नाम माथे करी जा री धोखाधड़ी माथे चिंता जताई-वणा लोगों सूं बिना डर्या डिजिटल सुरक्षा खातर जरूरी कदम उठाबा री सलाह दी।
- प्रधानमंत्री आकाशवाणी सूं मन की बात कार्यक्रम मांय वैश्विक एनिमेशन अर गेमिंग उद्योगां मांय भारत री बढ़ती भूमिका री सराहवणा करी।
- उपराष्ट्रपति जगदीप धनखड़ कया-आज रो युग डिजिटल क्रांति रो है अबे आर्टिफिशल इन्टेलीजेंस रे जरिये टेम रो चोखो इस्तेमाल व्हे रहयो है।
- दीपावली रे मौका माथे प्रदेशभर मांय शुद्ध आहार-मिलावट पर वार अभियान रे तैत कार्यवाही करी जा री है।

000

प्रधानमंत्री नरेन्द्र मोदी डिजिटल अरेस्ट रा बारा मांय चिंता जतायी। प्रधानमंत्री आज आकाशवाणी सूं मन की बात कार्यक्रम मांय कह्या के कानूनन किणी रो भी डिजिटली अरेस्ट न कियो जा सके है। वे कह्या के डिजिटल अरेस्ट रा नाम माथे करी जा री धोखाधड़ी ने रोकबा खातर सगळी जांच एजेंसियां मिल र काम कर री है।

.....

प्रधानमंत्री कार्यक्रम रे दौरान एक पीड़ित अर एक जालसाज रे बीच व्ही बातचीत ने भी सुणाया। बातचीत मांय जालसाज खुद ने पुलिस, सी.बी.आई. अर नार्कोटिक्स मेहकमां रो अधिकारी बता रह्यो हो। इण भांत रा जालसाज, पीड़ित सूं व्यक्तिगत सूचनावां ले र डर रो माहौल बणा देवे है। प्रधानमंत्री कह्या के हर वर्ग अर उम्र रा व्यक्ति डिजिटल अरेस्ट रा शिकार व्ह्या है। इण रे चालता वांने लाखो रूप्यां रो घाटो पूरयो है। वणा लोगों सूं अरज करी के इण भांत रा फर्जी कॉल आबा माथे डरणो नी चाहिजे। प्रधानमंत्री डिजिटल सुरक्षा खातर तीन उपायां माथे चर्चा करी। कल विश्व एनिमेशन दिवस है। इण मौके प्रधानमंत्री कह्या के भारत एनिमेशन री दुनिया मांय नई क्रांति री ओर बढ़ रह्यो है। वणा लोगों सूं अरज करी के वे भारत ने एनिमेशन री दुनिया री वैश्विक शक्ति बणावा रो संकल्प लेवे। प्रधानमंत्री कह्या के भारत गेमिंग री दुनिया मांय लगातार आगे बढ़ रह्यो है। भारतीय खेल दुनिया भर मांय पसंद कर्या जा रह्या है। प्रधानमंत्री कह्या कि अबे एनिमेशन इण भांत रो उद्योग बण ग्यो है जो दूजा उद्योगां ने भी ताकद दे रह्यो है। वी आर टूरिज्म इण रो एक उदाहरण है।

.....

प्रधानमंत्री आत्मनिर्भर भारत अभियान री सफलता माथे खुशी जतायी। वे कह्या के यो अभियान देश री सामूहिक चेतना रो अंग बण गयो है। वे कह्यो के कदे दुनिया मांय सब ऊं बत्तो सुरक्षा औजार खरीदबा वाळो भारत, आज, 85 देशां ने एक्सपोर्ट भी कर रह्यो है। स्पेस टेक्नालॉजी मांय भारत आज चंद्रमा रा साउथ पोल माथे पूगवा वाळो पैलो देश बण ग्यो है। प्रधानमंत्री श्रोतावां सूं नवाचार अर आत्मनिर्भर भारत संबंधी उदाहरण सोशल मीडिया माथे साझा करबा री अरज करी। वणा त्यौहारां रा इण मौसम मांय खरीदारी करता टेम वोक्ल फॉर लोकल रा मंत्र ने ध्यान मांय राखबा री आज करी। प्रधानमंत्री कह्या के इण बरस दो महान नायक-सरदार पटेल अर भगवान बिरसा मुंडा री 150वीं जयंती है। सरदार पटेल री 150वीं जयंती इण म्हीना री 31 तारीख ने है। जद के भगवान बिरसा मुंडा री 150वीं जयंती 15 नवम्बर ने मनायी जावेला।

.....

मन की बात मांय प्रधानमंत्री फिट इंडिया रा बारा मांय भी बात करी। वणा संतोष जतायो के भारत रा लोग फिटनेस रा बारा मांय बत्ता जागरूक व्हे रह्या है। प्रधानमंत्री सरदार पटेल री जयंती,

राष्ट्रीय एकता दिवस माथे हर बरस राख्यी जाबा वाळी रन फोर युनिटी ने दीवाळी रा त्यौहार रे चालता दो दिन पैली 29 अक्टूबर ने राखबा री जाणकारी देता थकां लोगां सूं इण मांय बत्ती संख्या मांय भाग लेबा ने कह्या। कार्यक्रम मांय प्रधानमंत्री देशवासियां ने आवता त्यौहारां री शुभकामनावां देता थकां पूरा उच्छाव रे साथै आं ने मनावे री अरज करी। प्रधानमंत्री रा मन की बात कार्यक्रम ने सुणबा खातर प्रदेश मांय भी खासों उच्छाव नजर आयो। मुख्यमंत्री भजन लाल शर्मा अर भाजपा प्रदेश अध्यक्ष मदन राठौड़ जयपुर मांय मुख्यमंत्री निवास माथे मन की बात कार्यक्रम ने सुण्या। प्रदेश भाजपा री कानी ऊं जिला मुख्यालय अर पार्टी कार्यालयां मांय कार्यक्रम राख्या गया। इण मांय बड़ी संख्या मांय सरकार रा मंत्री अर जनप्रतिनिधि अर कार्यकर्तावां भाग लिना।

000

उपराष्ट्रपति जगदीप धनखड़ कह्या के आज रो युग डिजिटल क्रांति रो है अबे आर्टिफिशल इन्टेलीजेंस रे जरिये टेम रो सही इस्तमाल व्हे रह्यो है। आज जयपुर रा राजस्थान इंटरनेशनल सेंटर मांय ई-लाईब्रेरी अर लॉयर्स डायरी रा लोकार्पण समारोह मांय उपराष्ट्रपति कह्या के केन्द्र री मोदी सरकार अंग्रेजां रा टेम रा बेबुनियाद कानूनां ने खतम कर र नया भारतीय कानून लागू कर्या है। इण सूं लोगां ने बेगी ई न्याय मिलेला। श्री धनखड़ कह्या के न्यायपालिका म्हका देश रो सब ऊं महताऊ अंग है। इण मांय सबॉर्डिनेट शब्द खातर कोई ठौड़ नी है। कोई भी न्यायालय सबॉर्डिनेट नी है इण मांय बदलाव व्हेणो चाहिज।

उपराष्ट्रपति कह्या के उद्योगपति अर कॉर्पोरेट समूहां ने दूजा संस्थानां ने दी जाबा वाळी सहायता री तर्ज माथे न्यायपालिका रा कार्यान्वयन मांय भी सहायता देणी चाहिजे। वकीलां ने संबोधित करता थकां वे कह्या कॉर्पोरेट्स रे कन्ने सीएसआर फंड है जिण ने वां ने लोकल अदालतों मांय इन्वेस्ट करणो चाहिजे।

000

दीपावळी रे मौके मिलावटी सामान अर अशुद्ध मिठाइयां री बिक्री माथे रोक लगाबा वास्ते प्रदेशभर भर मांय शुद्ध आहार-मिलावट पर वार अभियान रे तैत कार्यवाही करी जा रही है। सांचौर मांय खाद्य सुरक्षा टीम मिठाई री चार दुकानां सूं जांच खातर आठ नमूना लिया। वठिने 200 किलो मावो भी नष्ट कर्यो ग्यो। श्रीगंगानगर मांय रीको हलका मांय चल री फैक्ट्री मांय कार्यवाही करता थकां 12 हजार लीटर घी जब्त कर्यो ग्यो। इण घी रे मिलावटी होबा रो अदेशो है। प्रशासन री कार्यवाही रे दौरान फैक्ट्री मालिक मौका सूं फरार व्हे ग्यो।

000

आज पूरा देश मांय इन्फैंट्री दिवस मनायो जा रह्यो है। इण दिन भारतीय सेना री सब ऊं बड़ी लड़ाकू शाखा पैदल सेना रा योगदान ने याद कर्यो जावे है। 1947 मांय आज ई के दिन भारतीय सेना रा इन्फैंट्री-मैन श्रीनगर हवाई अड्डा माथे उतरबा वाळां पैला सैनिक बण्या, वणा पाकिस्तान रा हमलावरां ने पीछे हटबा खातर मजबूत कर दियो हो। इण मौके चीफ ऑफ डिफेंस स्टाफ जनरल अनिल चौहान अर सेना प्रमुख जनरल उपेंद्र द्विवेदी नई दिल्ली मांय राष्ट्रीय युद्ध स्मारक माथे पुष्पांजलि अर्पित करी। प्रधानमंत्री नरेन्द्र मोदी अर रक्षा मंत्री राजनाथ सिंह आज इन्फैंट्री दिवस रे मौके भारतीय सेना री सगळी रैंक अर दिग्गजां रा साहस अर भावना री सरावणा करी।

000

जयपुर रा राष्ट्रीय आयुर्वेद संस्थान मांय आयुर्वेद दिवस रे मौके काल निःशुल्क चिकित्सा शिविर राख्यो जावेला। शिविर मांय डायबीटिज, ब्लड प्रेशर, आर्थराइटिस, पेट संबंधी बीमारी, स्त्री रोग, नेत्र रोग, ब्यूटी केयर अर बड़ती उम्र री बीमारियां अर वां रो ईलाज अर पंचकर्म उपचार खातर राय दी जावेला। इण मौके निःशुल्क जांच करी जावेला अर दवा भी दी जावेला। वठिने नशामुक्ति खातर योग अर प्राणायाम संबंधी जाणकारी भी दी जावेला।

000

प्रदेश मांय बत्ती ठौड़ां माथे रात रा तापमान मांय कमी देखी जा री है। इण सूं सुवांरे अर सिंज्या हल्की ठण्ड व्हे री है। वठिने बत्ती ठौड़ां माथे दिन मांय तेज गर्मी रो असर व्हे रह्यो है। बीत्या

चौबीस घंटा मांय राज्य मांय सब ऊं बत्तो 39 दशमलव 4 डिग्री सेल्सियस तापमान बाड़मेर अर जैसलमेर ज़िला मांय दर्ज कर्यो ग्यो। वठिने सब ऊं कम 15 दशमलव 3 डिग्री सेल्सियस तापमान सिरोही मांय दर्ज क्यो। मौसम केन्द्र जयपुर रे मुजब आवता एक हफ्ता ताई राज्य मांय बत्ती ठौड़ां माथे मौसम सूखो रे सके है।

000

संसदीय कार्य अर विधि मंत्री जोगाराम पटेल आज जोधपुर रा जय नारायण व्यास विश्वविद्यालय रा पुराणा परिसर मांय राख्या रक्तदान शिविर मांय भाग लिया। इण मौके वे कया के रक्तदान महादान है अर रक्तदान करबा वाळा व्यक्ति महादानी है। वे कया के रक्तदान शिविर रे जरिये युवा समाज ने संदेश दियो है के रक्त री एक-एक बूंद मानव जीवन खातर अनमोल है।

000

उपमुख्यमंत्री दीया कुमारी आज अजमेर रा मेयो कॉलेज गर्ल्स स्कूल रा सालाना पारितोषिक वितरण समारोह रे दौरान कह्या के छात्रावां भविष्य मांय समाज ने नई दिशा दिखावेला। आ री देश रा भविष्य ने आकार देबा मांय महताऊ भूमिका रहवेला। उपमुख्यमंत्री कह्या के बालिकावां री कानी ऊं केई नया काम सरू कर्या ग्या है। इण सू देश भविष्य मांय नई दिशा मांय आगे बढेला। इण मौके मेयो कॉलेज गर्ल्स स्कूल समिति रा अध्यक्ष वी.पी. सिंह बदनोर समेत केई जान्या मान्या लोग मौजूद रह्या। उपमुख्यमंत्री खबर नवीसां सू बातचीत मांय कह्या के पुष्कर मेळो म्हाकी सांस्कृतिक धरोहर है। इण ने यादगार बणावा खातर पर्यटन महकमो पूरो प्रयास कर रियो है।

000